



Haaland dijangka mengetuai jentera serangan City dalam pertemuan Perisai Komuniti menentang Liverpool di Stadium King Power pada tengah malam Ahad.

Pertembungan dua penggempur

Dua muka baharu Liga Perdana Inggeris (EPL), Erling Haaland dan Darwin Nunez bakal menggamit tumpuan apabila Manchester City berdepan Liverpool dalam aksi Perisai Komuniti di Stadium King Power pada tengah malam Ahad.

Menjelang aksi pembuka tirai musim baharu EPL minggu depan, tekanan kini dihadapi Haaland dan Nunez untuk membuktikan prestasi mereka sesuai dengan 'tanda harga' masing-masing dalam tempoh beberapa bulan akan datang.

Haaland dan Nunez bernilai melebihi 100 juta pound (RM542.3 juta) dan mereka perlu meletakkan diri masing-masing sebagai penggempur paling digeruni di pentas EPL mulai musim depan.

City pastinya menagih sentuhan Haaland yang dibawa

masuk dari Borussia Dortmund bagi memacu skuad *The Citizens* untuk sekali lagi mendominasi saingan liga domestik.

Kejayaan menyambar trofi EPL kali keempat dalam tempoh lima musim terakhir membuktikan City jelas berada dalam kelas tersendiri biarpun dicabar hebat Liverpool.

Sedar kejayaan City musim lalu hadir tanpa penyerang utama, pengendali City, Pep Guardiola membuat pembelian besar dengan membawa masuk Haaland pada harga 51 juta pound (RM276.5 juta).

Selepas gagal mendapatkan penyerang Tottenham Hotspur, Harry Kane, Guardiola berharap Haaland mampu mengulangi ketajamannya seperti ketika bersama Dortmund.

Pemain antarabangsa Norway berusia 22 tahun itu hanya memerlukan 12 minit untuk

membuka jaringan buat City apabila meledak gol ketika aksi pramusim menentang Bayern Munich baru-baru ini.

Liverpool pula selepas kedatangan Sadio Mane yang menyertai Bayern, perlu mencari gandingan baharu Mohamed Salah dan tanggungjawab itu pastinya disandarkan kepada Nunez.

Tidak seperti Haaland yang mendapat lebih tumpuan ketika menyertai City, penampilan bekas penyerang Benfica berusia 23 tahun itu yang dibeli dengan harga 75 juta pound (RM406.27 juta) agak sederhana.

Malah, prestasi Nunez dalam kempen pramusim Liverpool sebelum ini juga menjadi tanda tanya susulan aksi tidak menentu yang ditampilkannya ketika berdepan Manchester United, Crystal Palace, RB Leipzig dan RB Salzburg.